



სახელმწიფო შესყიდვების
სააგენტოს თავმჯდომარის
გ ა ნ კ ა რ გ უ ლ ე ბ ა



KA080178707386519

№ 1522

18 / მარტი / 2019 წ.

ი.მ. ნიზამი ორუჯევის გაფრთხილების შესახებ

შემსყიდველი ორგანიზაცია: შპს „გარდაბნის თბოსადგური“;

ტენდერის ნომერი: SPA180001582;

შესყიდვის ობიექტი: 50100000 – სატრანსპორტო საშუალებებისა და მათთან დაკავშირებული მოწყობილობების შეკეთება, ტექნიკური მომსახურება და მასთან დაკავშირებული მომსახურებები;

მიმწოდებელი: ი.მ. ნიზამი ორუჯევი (პირადი №12001073788);

წერილობითი შეტყობინების საფუძველი: სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულება.

აღწერილობითი ნაწილი

1. ადმინისტრაციული წარმოების დაწყება

1.1. სახელმწიფო შესყიდვების სააგენტოში 2019 წლის 7 თებერვალს წარმოდგენილ იქნა შპს „გარდაბნის თბოსადგურის“ 2019 წლის 7 თებერვლის № GAR01-070219-02 წერილობითი შეტყობინება (რეგისტრაციის № 1417), რომლითაც სააგენტოს ეცნობა ი.მ. ნიზამი ორუჯევის (პირადი № 12001073788) მიერ SPA180001582 ელექტრონული ტენდერის საშუალებით დადებული 2018 წლის 1 მარტის № 23-010318-01 სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულების თაობაზე.

1.2. სააგენტომ ი.მ. ნიზამი ორუჯევს 2019 წლის 11 თებერვლის № 580 წერილით აცნობა სააგენტოში შემსყიდველი ორგანიზაციის წერილობითი შეტყობინების წარმოდგენის თაობაზე და, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-5 მუხლის მე-5 პუნქტის შესაბამისად, სთხოვა ხსენებულ საქმეზე წერილობითი განმარტების წარმოდგენა. მიმწოდებელს განმარტება არ წარმოუდგენია.

2. შემსყიდველი ორგანიზაციის პოზიცია

შემსყიდველი ორგანიზაციის წერილობითი შეტყობინების თანახმად, მიმწოდებელს, 2018 წლის 1 მარტის № 23-010318-01 სახელმწიფო შესყიდვის შესახებ ხელშეკრულების საფუძველზე, ხელშეკრულების გაფორმებიდან 2019 წლის 1 მარტის ჩათვლით, მისთვის უნდა გაენია ავტოსატრანსპორტო საშუალებების რეცხვის მომსახურება. ხელშეკრულების ღირებულებად განისაზღვრა 6 144 ლარი, ხოლო მოქმედების ვადად – 2019 წლის 31 მარტი. მიმწოდებელმა არაჯეროვნად შეასრულა ხელშეკრულებით ნაკისრი ვალდებულებები, რის გამოც, შპს „გარდაბნის თბოსადგურმა“ 2019 წლის 22 იანვრის № GAR-01-220119-2 წერილით შეწყვიტა მხარეთა შორის გაფორმებული 2018 წლის 1 მარტის № 23-010318-01 სახელმწიფო შესყიდვის შესახებ ხელშეკრულება.

3. მიმწოდებლის პოზიცია

მიმწოდებელს ადმინისტრაციული წარმოების ფარგლებში განმარტება არ წარმოუდგენია.

4. სააგენტოს მიერ დადგენილი გარემოებები

4.1. 2018 წლის 7 თებერვალს შპს „გარდაბნის თბოსადგურმა“ გამოაცხადა SPA180001582 ელექტრონული ტენდერი მანქანის რეცხვისა და მსგავსი მომსახურებების (CPV50112300) შესყიდვის მიზნით.

4.2. სატენდერო კომისიის 2018 წლის 23 თებერვლის № 3 სხდომის ოქმით ი.მ. ნიზამი ორუჯევი (პირადი № 12001073788) გამოვლინდა გამარჯვებულად და მიწვეულ იქნა სახელმწიფო შესყიდვის შესახებ ხელშეკრულების გასაფორმებლად.

4.3. 2016 წლის 1 მარტს მხარეთა შორის გაფორმდა № 23-010318-01 სახელმწიფო შესყიდვის შესახებ ხელშეკრულება, რომლის საფუძველზეც, მიმწოდებელს, ხელშეკრულების გაფორმებიდან 2019 წლის 1 მარტის ჩათვლით, შემსყიდველი ორგანიზაციისთვის უნდა გაენია ავტოსატრანსპორტო საშუალებების რეცხვის მომსახურება. ხელშეკრულების ღირებულებად განისაზღვრა 6 144 ლარი, ხოლო მოქმედების ვადად – 2019 წლის 31 მარტი.

4.4. მიმწოდებელმა განია 3 437 ლარის ღირებულების მომსახურება (სრული მოცულობის 56%), რაც დასტურდება მხარეთა შორის გაფორმებული მიღება-ჩაბარების აქტებით.

4.5. შემსყიდველი ორგანიზაციის 2019 წლის 14 იანვრის № GAR-01-140119-1 წერილიდან ირკვევა, რომ 2018 წლის დეკემბრისა და 2019 წლის იანვრის პერიოდში მიმწოდებელი სისტემატურად არღვევდა ნაკისრ ვალდებულებებს, კერძოდ, უარს აცხადებდა რეცხვის მომსახურების განევაზე. შემსყიდველმა ორგანიზაციამ მიმწოდებელს მოსთხოვა ვალდებულებების შესრულება. წინააღმდეგ შემთხვევაში, იგი შეწყვეტდა 2018 წლის 1 მარტის №23-010318-01 სახელმწიფო შესყიდვის შესახებ ხელშეკრულებას.

4.6. ხელშეკრულებით ნაკისრი ვალდებულებების არაჯეროვანი შესრულების გამო, შპს „გარდაბნის თბოსადგურმა“ 2019 წლის 22 იანვრის №GAR-01-220119-2 წერილით შეწყვიტა მხარეთა შორის გაფორმებული 2018 წლის 1 მარტის №23-010318-01 სახელმწიფო შესყიდვის შესახებ ხელშეკრულება.

სამოტივაციო ნაწილი

5. შემაჯამებელი დასკვნა

საქმეში არსებული მტკიცებულებებისა და გარემოებების შეფასებისა და ურთიერთშეჯერების საფუძველზე, სააგენტო მიიჩნევს, რომ ი.მ. ნიზამი ორუჯევს უნდა მიეცეს გაფრთხილება.

6. გამოყენებული სამართლებრივი აქტები

სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესი და პირობები“.

7. სამართლებრივი შეფასება

7.1. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-3 მუხლის მე-4 პუნქტის „ბ“ ქვეპუნქტის თანახმად, სახელმწიფო შესყიდვის ნებისმიერი საშუალებით განხორციელებისას, გარდა კონსოლიდირებული ტენდერისა, პრეტენდენტის/მიმწოდებლის შავ სიაში დარეგისტრირების საფუძველია, თუ მიმწოდებელმა ვერ შეასრულა ან არაჯეროვნად შეასრულა ხელშეკრულებით ნაკისრი ვალდებულებები. იმავდროულად, აუცილებელია, რომ ხელშეკრულების მოქმედების ვადა იყოს გასული ან ხელშეკრულება ვადაზე ადრე იყოს შეწყვეტილი.

7.2. იმავე წესის მე-7 მუხლის მე-2 პუნქტის შესაბამისად, საქმეში არსებული გარემოების გამოკვლევის, შეფასებისა და ურთიერთშეჯერების შედეგად, სააგენტო ადგენს, არსებობს თუ არა პრეტენდენტის/ მიმწოდებლის შავ სიაში დარეგისტრირების საფუძველი. იმ შემთხვევაში, თუ არსებობს ამ მუხლის მე-4 პუნქტით გათვალისწინებული გარემოებები, სააგენტო იღებს გადაწყვეტილებას პრეტენდენტის/ მიმწოდებლის შავ სიაში დარეგისტრირებაზე უარის თქმის შესახებ, ხოლო იმ შემთხვევაში, თუ არსებობს პრეტენდენტის/მიმწოდებლის შავ სიაში დარეგისტრირების საფუძველი, სააგენტო, ამ მუხლის შესაბამისად, იღებს გადაწყვეტილებას პრეტენდენტის/მიმწოდებლის გაფრთხილების ან შავ სიაში დარეგისტრირების შესახებ.

7.3. მოცემულ შემთხვევაში, დგინდება, რომ მიმწოდებელმა არაჯეროვნად შეასრულა 2018 წლის 1 მარტის № 23-010318-01 სახელმწიფო შესყიდვის შესახებ ხელშეკრულებით ნაკისრი ვალდებულებები. ამდენად, სახეზეა მიმწოდებლის გაფრთხილების ან შავ სიაში დარეგისტრირების წინაპირობა.

7.4. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-3 პუნქტის შესაბამისად, გაფრთხილების ან შავ სიაში დარეგისტრირების შესახებ გადაწყვეტილების მიღებისას, სააგენტო, საქმისთვის მნიშვნელობის მქონე გარემოებებთან ერთად, დამატებით ითვალისწინებს დარღვევის სიმძიმეს, პრეტენდენტის/მიმწოდებლის მანამდე მიღებული გაფრთხილების თუ შავ სიაში რეგისტრაციის ფაქტ(ებ)ს, მისი სახელმწიფო შესყიდვებში მონაწილეობის აქტივობას.

7.5. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-5 პუნქტის თანახმად,

გაფრთხილების შესახებ გადაწყვეტილება მიიღება იმ შემთხვევაში, თუ შემსყიდველი ორგანიზაციის მიერ წარდგენილი წერილობითი შეტყობინება სრულად აკმაყოფილებს ამ წესის მე-3 და მე-4 მუხლებით განსაზღვრულ მოთხოვნებს, მაგრამ პრეტენდენტის/მიმწოდებლის შავ სიაში დარეგისტრირებით დაირღვევა თანაბრობის პრინციპი. გაფრთხილება გამოიყენება ერთხელ და მოქმედებს ერთი წლის განმავლობაში.


7.6. განსახილველ შემთხვევაში, სააგენტო მიიჩნევს, რომ შემსყიდველი ორგანიზაციის წერილობითი შეტყობინება აკმაყოფილებს ზემოაღნიშნული წესის მე-3 და მე-4 მუხლებით განსაზღვრულ მოთხოვნებს. ამასთან, სააგენტო ითვალისწინებს მიმწოდებლის მიერ განუვლი მომსახურების ღირებულებას (სრული მოცულობის 56%). ამდენად, სააგენტო მიიჩნევს, რომ, ამ ეტაპზე, ი.მ. ნიზამი ორუჯევის შავ სიაში დარეგისტრირებით დაირღვევა თანაბრობის პრინციპი და მიზანშეწონილია მის მიმართ გაფრთხილების გამოყენება.

სარეზოლუციო ნაწილი

სააგენტომ იხელმძღვანელა სახელმწიფო შესყიდვების სააგენტოს თავმჯდომარის 2015 წლის 29 ოქტომბრის №19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-5 პუნქტით და დაადგინა:

- 1. ი.მ. ნიზამი ორუჯევი (პირადი №12001073788) 2019 წლის 19 მარტს მიეცეს გაფრთხილება.
- 2. დაევალოს სახელმწიფო შესყიდვების სააგენტოს ინფორმაციული ტექნოლოგიების დეპარტამენტს სააგენტოს ვებგვერდზე შესაბამისი ჩანაწერის გაკეთება.
- 3. ეს განკარგულება შეიძლება გასაჩივრდეს მისი ოფიციალური გაცნობის დღიდან ერთი თვის ვადაში, თბილისის საქალაქო სასამართლოს ადმინისტრაციულ საქმეთა კოლეგიაში (ქ. თბილისი, დავით აღმაშენებლის ხეივანი, მე-12 კმ, №6), კანონმდებლობით დადგენილი წესით.

თავმჯდომარე



ლევან რაზმაძე